


# d'Räppli



## Fasnacht 2008

Dr Basler-EHC, miir finde's nimm gediige,  
wie die statt stoo als uff em Yys dien ummeliige.  
Bald spiile sy wo's an de Bahnheef haisst efange  
"Halt, nur wenn Nääbelfrey und au nur uff Verlange"

In d'Verantwortig sodme d'Eltere derfe nää,  
dr Eymann maint es wurdi z'viel so jungi Sinder gää.  
Jetz muess vom Bläsiring, d'Meiere, die alti Glugge,  
fir iire Sohn als Stroof nomoll go d'Schulbangg drugge.

D'Martina Hinggis, es isch zwoor nit gradd zem Lache,  
kuum isch iir Mammi wägg, macht sy scho dummi Sache.  
Drbyy hänn Alli dänggt as sy, statt Droge schlugge,  
vyyli lieber wurdi noo an iirem Nuggi sugge.

In Ziiri isch es häll, e huffe sehsch nur renne,  
will e grosses Huus ganz lichterloo duet brenne.  
Dert maint grad ain, die Zünfter syyge doch die beschte,  
z'mitts im Winter welle sy dr neyi Böög go teschte.

Zueständig fiir Dy Gsundhait isch unsd blybt dr Doggter,  
fiir s'Filze isch's dr Dieb, doch denn druff aabe hoggt-er.  
Zueständig isch dr Buur fiir s'Heu und s'ganzi Fueeder,  
und fiir dr "Jet-Set", d'Paris-Hilton, "s'Party-Lueder".

Ass Männer s'Joowoort unterenander tusche,  
losst Fraue nur e Lächle iiber d'Lippe husche.  
Es nääm sy Wunder, spöter mit me Buschi zämme,  
wohäär die d'Muettermilch denn pletzlig amme nämme ?

Mer hänn uns gfrogt in letschter Zyt doo uff dääre Aerde,  
wie kaasch in Basel ze me "Prominänte" wäärde ?  
De goosch zer SVP und denn liggt's äntlig dinne,  
ass denn au Du dr Schnabelbryys deersch emoll gwinne.

Swänn d'Ziircher an dr Fuessball-EM uns denn zaige,  
ass sy bi de Krawall dr besser Schugger haige.  
Miir finde, dien jetz ebbe jo nit iibertrybe,  
drfiir kaa unsere besser Buesse-Zeedel schryybe.

S'wird uff Artiggel gsetzt, mer maine Billigwaare,  
miir hänn so Sogge kaufft, hejoo mer mien halt spaare.  
Nur zweimool aagleggt, das duet zimmlig alles haisse,  
gseesch scho bi zwai bis drey Paar d'Zeeche uusegnaisse.

Me will fiir unsri Gescht jetz Basel praggtisch gschtalte,  
dr BVB-Bus soll vor Bachmann's Kaffi halte.  
Kai Hetzerei mee, die kaasch kimftig als vergässe,  
dr Schofför waarti schyynt's bis de hesch z'Morge g'ässe.

S'isch unsri Dante z'Thun jetz gänzlig uus de Fuege,  
sy goot trotz iire Nyynzig jeede Matsch go luege.  
Und maint däa Sexifall däa haig sy scho belaschtet,  
doch haig vom Fuessballclub no Kaine sy betaschtet.

Iir wäärdet speeter e'mool gsee, iir dünne faisse,  
wo gholffe hänn dr Christoph Blocher use schmaisse.  
Me wird jetz laange wyyli im Bundeshuus scho gspyyre,  
ganz bsunders nämligg syyni Rumpelstilz aalyyre.

---

Wottsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---

Drugg: H. Leidenfrost AG Basel